

兩  
浙  
名  
賢  
錄

兩浙名賢錄卷三目次

宋理學

儒志王景山先生

謙靖劉必明先生

奧塘林介夫先生

劉質夫先生

周恭叔先生

大劉先生

戴明仲先生

弟迅附

蔡君濟先生

徐八行先生

小劉先生

草堂張子克先生

嘉慶沈彬老先生

從弟琪附

宋廷佐先生

橫塘許少伊先生

鮑商霖先生

徐季節先生

喻子才先生

王文季先生

無垢張子韶先生

香溪范茂明先生

石子重先生

東萊呂伯恭先生

潘叔度先生

詹體仁先生

錢子是先生

徐誠叟先生

南溪柴與之先生

柴元振先生

江邦直先生

陳少南先生

鄭景望先生

弟伯英  
伯海附

薛士龍先生

王龜齡先生

俞季淵先生

黃仲庸先生

陳叔向先生

陳止齋先生

慈湖楊敬仲先生

袁和叔先生

子甫附

沈晦叔先生

藝堂湯達可先生

林景文先生

南坡葉茂叔先生

艮隱戴少望先生

葉水心先生

周子靖先生

郎晦之先生

劉子宣先生

舒元質先生

山堂章俊卿先生

李從仲先生

船山楊子權先生

傅貽輔漢卿先生

徐崇甫先生

葉成父先生

西山葉知道先生

西山真希元先生

潛室陳器之先生

錢木之徐  
寓徐客附

北山何子恭先生

王會之先生

徑畝徐景說先生

趙德父先生

車清臣先生

康敏黃立道先生

庶善翁如山先生

張伯誠先生

仁山金吉父先生

劉習父先生

黃東發先生

蛟峯方君錫先生

弟  
振附

兩浙名賢錄卷三目次終

兩浙名賢錄卷之三

東海徐象梅仲和氏謨

海鹽姚士彝叔祥氏閱

理學

宋 共七十九人

儒志王景山先生

王開祖字景山永嘉人少敏悟書經目輒成誦登皇祐進士不調而歸杜門讀書從學嘗數百人復召試賢良方正未行而卒年三十一故著書多無傳惟儒志一編

聖學

卷之三

一

光緒

門人傳習其首章言復者性之宅無妄者性之原又言學者離性而言情奚情之不惡又曰使孔子用於當時六經之道不若今之著矣末章言由孟子以來道學不明吾欲述堯舜之道論文武之治杜淫邪之路闢皇極之門吾畏諸天者也吾何敢已哉旨意大都類此當慶曆皇祐間宋興未百年經術道微伊洛諸儒未作景山獨能研窮經蘊發明道學二字此吾浙理學大淵源也後四十餘年伊洛道學儒宗始出郡之諸儒從游還鄉轉以授受而理學盛行矣楊守蟠立儒志坊以表其居



學者至今稱儒志先生

謙靖劉必明先生

劉愚字必明，龍游人。幼警敏，力學弱冠入太學，有聲從游者甚衆。上舍釋褐第一，調江陵府教授。歲滿，帥王蘭致書剡辟，因辭貧不能歸，移安鄉縣令。邑逋賦萬計，愚覈其實數，寬其限期。民不見吏而賦自足。會歲歉，出常平米賑貸，僚佐不可。愚曰：「有罪不以相累。」出緡錢數千，萬召糴米，價頓減。因積米數千石以備荒。諸司交薦改秩，愚雅不樂仕進，遂致仕歸。結廬城南頽垣蓬戶蕭然。

自適閒居二十年著述不輟書禮語孟皆有解削蕪艾異務以發明理學之奧年八十三卒其門人私謚曰謙靖先生

與塘林介夫先生

林石字介夫瑞安人少有志操初習進士聲律既而曰古人之學不如是也遂刻意諸經聞括蒼管師常明春秋性從之師常與之反覆辯難自以爲不逮遭父喪廬墓三年不茹草木之滋臨川王氏三經行石獨不趨斯學以春秋教授鄉里既而春秋爲時所禁乃絕意仕進

築室躬畊作萱草堂以養母或勸以仕不答講論古今  
必先行實而後文藝曰本之不立末於何有邑官初至  
率上謁執弟子禮未幾母卒年九十餘白首終喪人以  
爲難建中靖國元年無疾而逝周行已爲沈子正墓銘  
云河南程正叔京兆呂與叔括蒼龔深之與介夫皆傳  
古道名世宗師惟是書成弗以示人故世無傳焉學者  
至今皆稱與塘先生

劉質夫先生

劉絢字質夫常山人從游程氏之門力學不倦程子每

語人曰。他人之學。敏則有矣。未易保也。若絢者。吾無疑焉。歸而教授。羔鴈成羣。理學之明於衢者。絢力也。

周恭叔先生

周行已字恭叔。永嘉人。祖豫父。泳皆中第。行已風儀秀整。語音如鐘。讀書十行俱下。入太學。以文行著作。齊輯文同舍。遵行之。豐司業。稷騶從闕。敦化堂下行已移書。規切之。稷愧謝。由是名重京師。時新學行。獨之。伊洛從程伊川。二劉。許。趙。繼至。皆敬下之。作顏子不二過論。有曰。過不必大。毫末萌於心。而天地爲之應悟。不必久。斯

溷著於心而天下歸其仁。或以呈伊川。伊川可之曰。是子達早。然亦憂其退速。登元祐第時。太學九人中。行已最先進。京師貴人爭欲妻之。行已曰。吾姨母貧。其女贅未適。吾母雖不言。意已有屬。養志可也。辭昏。歸娶之。伊川語人曰。某年未三十。亦做不得此事。崇寧行舍法。選師儒除太學博士。行已請於朝。願分教鄉里。以便親養。詔許之。仍帶舊官。於是。以所聞於程氏者。發明旨要。以迺後進。吾浙之有洛學者。是行已始也。宣和初。除秘書正字。鄆守王覲請爲幕賓。後卒於鄆。覲以朝命津其喪。

歸葬安固有文集三十卷唐守文若繪像祠於學官族  
孫去非爲南軒張栻高弟

大劉先生

劉安節字元承永嘉人幼有遠度比長嗜學有所未達  
夜以繼日必得乃止與從弟安上同游太學復之洛師  
程氏所聞最多今河南語錄第十八卷凡二百五十餘  
條皆安節手編也登元符第初調諸暨簿萊州教授宰  
相薦召對便殿稱旨除監察御史連決大獄多所平反  
知饒州發廩賑飢悉除民害徙知宜州饒民遮道涕泣

謂吾州自范文正公以後一人而已至宣值大水躬督拯拯賑給遠近無所失復際大疫分醫治療所活不可計安節亦得疾卒年四十九終承議郎部使者表其勤民至死狀有旨官其子誠安節天資近道望之知其爲君子講學嘗指其要使人廓然知聖賢岐轍可進學者稱爲大劉先生

戴明仲先生 年近耄

戴述字明仲永嘉九曲人孝友直諒爲文操筆立成人京師試廣文館趙丞相主文柄得其文謂爲老儒擢異

等而述未冠也由是知名述以科舉口耳之學爾走伊洛求所謂爲已者俄遭父喪哀毀不如菜果廬墓終喪登元符三年進士第調東陽簿州徙監銀冶以法弊不獲賦歸去來十章投檄而歸會州選學官爲臨江教授以母憂去職得疾於倚廬醫曰是疾不可以風盍遷諸內述不可曰疇昔之夜吾夢有告以死生之說者吾其亡此乎蓋六日而卒大觀四年三月也周博士志其墓曰明仲資稟剛明少而有立嘗從程氏學問知聖人之道近在吾身退而隱於心合於聖人之言者若有自得



方沉涵克擴日進未已朋友鄉黨期以有爲於世而年纔三十有七奄至大故可謂不幸也已弟迅字幾仲亦以文學著世稱二戴先生

蔡君濟先生

蔡元康字君濟平陽人資稟剛峻學識過人旣冠入太學見同舍從事文藝慨然曰科舉所須耳學止是耶賢有德者一言一行孜孜訪之惟恐不及其學一以正心誠意爲本優游涵養日起自得一時賢士大夫若鄒浩陳瓘楊時皆敬愛之鄒陳在謫元康從之鄒病革盡吐

平生所欲言者性命之理。死生之說。見於問答。云在京師。逆旅失金。或得諸同舍篋中者。以告。元康曰。此非吾金也。嘗曰。古之人。全交非一道也。必欲伸已以求名人。將何望。往來京師。朋友病爲之醫藥。同寢處無倦色。死則主其後事。或護其喪以歸。前後以十數。七上禮部。不中。會以八行取士。郡條其應令者數十事。上諸朝。未報卒。

徐八行先生

徐中行。臨海人。始聞安定胡瑗講明道學。從其徒劉彝。

得所授經熟讀精思踰年乃歸葺一小室竟日危坐幾  
於解悟父死跣足廬墓躬耕養母教授學者必自澆掃  
應對格物致知以達於治國平天下俾不失其性不亂  
其倫而後已崇寧中章蔡竊國柄竄逐善類且盡每一  
聞命未嘗不淚下州守李諤舉應八行科中行間之盡  
毀其所爲文入黃巖委羽山中避焉或問之曰人而無  
行與禽獸等使吾得以八行應科則彼之不被舉者非  
人類與旣歿陳忠肅公璣錄其行事謂與山陽徐積齊  
名呼爲八行先生

小劉先生

劉安上字元禮生有淑質端重嗜學與從兄安節俱以學行爲鄉望所推聯薦於鄉同游太學一時賢士大夫慕與之交號二劉竝走洛從程氏登紹聖四年進士調授唐尉登州教授崇寧舍法選除太學博士遷提舉兩浙學事陞錄進對稱旨上顧近臣稱其蘊藉有大臣體卽日拜監察御史朝廷有推鞠多以屬安上持法尤審而根於誠恕多所平反遷殿中侍御史不弛擔石爲上計安上性謹密凡風聞事皆反覆詢究或遣親信參驗

必資始論列舉無不當一日奏事退上目送之曰劉某  
言事可謂詳審矣屬蔡京權政竊弄威福黨與蟠結無  
敢撓其鋒安上抗章極言其罪數十條未報復與中丞  
石公弼率同列廷劾之京以太乙宮使罷相遂致仕安  
上遷右諫議大夫母憂服闋除中書舍人給事中會京  
落致仕三日至都堂治事安上乞補外以徽制知壽春  
論罷奉祠再起知婺州移邢州以祖母年九十丐歸養  
服闋再知壽春百姓扶迎屬路歲飢活民以殿賦降官  
罷再起知舒州以疾致仕未幾卒安上有至性事親孝

居喪幾至委頓先達豐稷徐處仁薦之恐後未嘗私謝  
在御史不爲訐直名論事退削藁有詩五百篇制誥雜  
文三十卷學者稱小劉先生

草堂張子克先生

張輝字子克永嘉城南人天資謹飭喜問學自六經諸  
子書歷代史記下至百家之說皆通習其辨析精微旁  
引證據論議亹亹雖老儒先生莫能屈也游太學屢先  
多士傳誦其文以爲式親喪廬墓作霜露堂以享有甘  
露降於庭人以爲孝感所致請以甘露易扁輝曰吾自

衡耶復築室基傍日從事于誠正之學學者從之益衆  
至無地以處之州舉八行不就政和二年上舍擢第調  
奉興簿三合法選洪州教授被召爲國子學錄供職逾  
月卒嘗據古人行事斷以已意曰草堂語錄鄉人稱之  
曰草堂先生

嘉慶沈彬老先生

從弟琪附

沈躬行字彬老永嘉人自幼力學有家法非義弗蹈甫  
冠游太學同輩以時文相尚躬行獨爲古學居父憂哀  
毀骨立以近世喪葬禮廢陋俗至用夷狄法始倣古正

棉衾饋奠衰服之制斥佛事不用雖州里族黨率非之不顧也始從與塘林氏後從伊川程氏藍田呂氏其學以中庸大學爲本篤信而力行之故能卓然以聖賢爲依歸平居色夷氣和似不能言及辯是非則毅然不可奪族姻貧無歸者無不收恤鄉人矜式焉從弟琪字東美以行義著稱聚族而居寢舍飲食皆倣古制鄉人尊之曰嘉慶先生

宋廷佐先生

宋之才字廷佐遂安人學於楊時遂祖程氏登重和第



教授京兆每言士負卓犖奇材皆可入聖賢之域患速  
售爾故深務靜養積十八年不易初官執政薦召試除  
正字丁母憂服除入爲校書郎遷考功論南北雖已通  
和願勿忘警戒舉廢墜拔滯淹寬民力總兵權益固基  
圖爲進取計遷司業權禮部侍郎會妻子俱喪乞去除  
敷文閣待制奉祠起知衢州卒之才性恬靜寡欲操履  
潔白難進易退仕五十年屏處之日三居二焉

橫塘許少伊先生

許景衡字少伊瑞安人器質端重幼如成人旣冠入太

學三經義行景衡獨之洛師程氏得其旨歸登紹聖第  
由通判福州除監察御史遷殿中侍御史首論童貫大  
罪數十譚種罪大罰輕且言今三省闕長官樞密久虛  
位軍政不立邊防未肅宜選忠良以任政府王黼惡其  
多言以他事逐之靖康初召試中書舍人會李光程瑤  
俱以臺諫忤耿南仲斥景衡封還不行請祠去高宗卽  
位除給事中遷御史中丞初兩河失守宰相李綱建議  
請幸南陽廷論未決景衡言南陽無城池漕運不繼乞  
幸東京象天魚流上上從之復上上嘉其忠國策上

知其可任拜尚書右丞金兵迫京師時相請降詔還京  
景衡申前議請幸建康言者希旨沮之遂乞罷政以資  
政殿學士提舉洞霄宮去國之明日聞下還京之詔拊  
膺駭歎遂以憂成疾行至瓜州卒贈正奉大夫瑞安縣  
開國男謚忠簡胡文定安國銘其墓略云踐修厥德勁  
直而維先事而謀措國於安又云邪說盛行徒得公重  
和而不同仁者之勇學者至今稱橫塘先生

鮑商霖先生

鮑若雨字商霖永嘉人從伊川程先生學有問答六章

構橋亭於所居宅前之雁池。扁曰敬亭。張思叔爲之記。  
云鮑君商霖自永嘉來學於伊川先生。勤苦自勵。蚤夜  
孜孜。不舍於。是吾先生之門。以君爲畏友。其見稱於伊  
洛諸儒如此。後居鄉教授。值宣和方寇之亂。率鄉人捍  
禦。有司奏功第一。不受賞。擢會三舍法。行嘗兩貢。謫免。  
部上之。至汴京。未拜命卒。

徐季節先生

徐庭筠字季節。八行先生子也。其學以誠敬爲主。夜必  
起。榻而後脫巾。平居無惰容。無戲色。雖就屋以居。而未

嘗感戚孝友天至既免喪猶不忍娶者十餘年秦檜當  
國試題問中興歌頌庭筠歎曰今日豈歌頌時耶因疏  
其未足為中興者五且曰吾不忍欺君也縣尉鄭伯熊  
當代去請益庭筠曰富貴易得名節難守願安時處順  
主張世道伯熊受其言訖爲名臣時有詔舉人五上春  
官者予岳祠庭筠應格所親勸之行庭筠曰吾嘗草封  
事謂岳廟冗祿無用旣心非之可躬蹈邪卒不就淳熙  
間朱文公熹行部拜墓下大書以表之曰有宋高士二  
徐先生之墓又題詩云道學傳千古東甌說二徐門清

一壺水家富五車書其見景慕如此

喻子才先生

喻樛字子才建德人受業楊龜山聰明穎悟博通經史  
嘗據一巨石以校書因名硯石登建炎進士第趙忠簡  
公崇尚洛學薦除正字告詞有曰頃窮西洛之淵源遂  
見古人之大體雖爲衆所嫉而忠簡知之益信累官工  
部員外郎知蘄州孝宗卽位用爲提舉浙東常平以治  
績聞樛爲人質直好議論尤善讜鑒嘗言沈晦張九成  
進士當第一後果然有二女富人交請婚不許及見汪

應辰張孝祥曰佳婿也遂以妻之所著有中庸大學論語解及玉泉語錄行於世

王文季先生

王光祖字文季官大理評事精於理學朱文公提舉時邂逅松陽之福安僧舍文季拱立規掌如太極狀公卽異之曰王子胷中自有太極間以傳註質之文季曰公註中庸不使滋長於隱微之中愚意當加潛暗二字公深然之後數以詩文往復有寄孫竹湖書曰吾到括止得士友王文季一人而已

無垢張子韶先生

張九成字子韶錢唐人徙鹽官八歲默誦六經十四鄉貢從楊時學權貴託人致幣曰游吾門當薦之館閣九成笑而却之紹興二年策士詔以直言置高第九成所對謂禍亂之作天所以開聖人上及二聖忠憤激烈下及閭寺無所顧避高宗感動擢置第一楊時遣九成書曰廷對自中興以來未之有非剛大之氣不爲得喪回屈不能爲僉判鎮東軍大書屋壁曰此身苟一日之開百姓懼無涯之苦趙鼎薦之召入著庭時樊光遠首南



官汪應辰魁大對。帝語九成曰：殿省居首，皆卿門人。對曰：臣不敢以利祿之說誘門人，惟知講明經術庶盡忠孝。尋除浙東提刑。力辭，詔與小郡。又辭，乃與祠。未幾召除宗正少卿，遷禮部侍郎，尋兼侍講，進讀春秋。因言曰：食之變本於惡氣，惡氣之萌本於惡念。惡氣所觸，則日月薄蝕，五星失序，災及五穀，恠妖迭見，爲兵爲火，札瘥並至。願陛下正心術以格天。高宗聳然曰：當爲卿戒之。又論齊宣王不忍一牛之死，仁心發見，爲王道端倪。推此心以往，則華夏蠻貊根莖鱗介皆在陛下。仁政高宗

問和議九成言虜情多詐不可不察秦檜惡之九成以  
趙鼎黨求去謫守邵州落職詹大方論其謗訕謫居南  
安軍凡十四年談經自樂因自號橫塘居士檜死以秘  
撰起知溫州惠利及民民至感泣丐祠卒上嗟悼復敷  
文待制官其弟若子四人學者稱無垢先生有尚書中  
庸大學孝經語孟說無垢錄行于世理宗以九成有明  
道之功特贈太師封崇國公謚文忠

香溪范茂明先生

范浚字茂明蘭谿人家世業儒父祖昆季皆顯宦浚獨

不近榮利紹興間嘗舉賢良方正以秦檜當國不起閉  
門講學篤志求道危坐一室貌恭心泰學者稱之曰香  
溪先生有文集二十四卷行於世晦庵朱子獨表章其  
學也今唐君韶有言曰先生之文誦習者心箴而  
行者有知者今觀其言如以耻爲入道之端以古  
之賢爲由海而底又謂學者覺也心且不存何  
有覺哉自得於學極有警發不獨心箴爲可取  
也其言不知從誰學之語先輩謂其得於孟子者  
爲多居靖初世廟御註心箴與四箴註並頒布天下

學宮而民之學愈爲顯焉

五子重先生

石塾字子重。新昌人。幼端懿。警悟博覽。羣書以發明聖學爲己任。登紹興己丑進士。授桂陽簿。還同安丞。歲饑。自府請蠲租。酌以便宜。民德其惠。改知武進縣。有訟數年不決。一訊立辨。郡守欲爲寓客治第。屬役於縣。費鉅萬。整執不可。曰。剝民膏血以媚人。吾不忍也。守怒。欲中以法民數千人。相與詣郡。俟守出。遮道號訴。至有號其襁帷者。守不能禁。因更調。尤溪縣時學校久廢。整延其

友古田林用中來掌教事旦夕率佐史賓客往論之聞  
陳理道諸生莫不感奮他郡士有裹糧來學者至不能  
容乃爲拓地廣齋舍置田數百畝贍之更考古制舉行  
鄉飲酒禮於是士咸知學而民俗大變監察御史陳舉  
善丞相史浩先後薦於朝有旨召對首陳君道與天地  
準言甚剴切上嘉納之累遷太常主簿代朱熹知南康  
軍未行熹使浙東聞新刻饑民轉入台境亟以屬整  
整毅然任之不辭勞劇所全活甚衆熹曰此儒者康濟之  
效也整天資高邁究心理學與熹友益講明經傳宗旨

盡得其精奧發爲著述簡明醇粹多與熹合所著中庸  
集解熹嘗采之而中庸集註又別爲輯略以存諸儒之  
說而整導經術道之爲益彰矣一時學者多師事之熹  
嘗呼曰子重兄及卒爲誌其墓有文集十卷集周易大  
學中庸解數十卷傳於世嘉靖間郡守洪珠特建書院  
於鼓山崇祀而表章之

東萊呂伯恭先生

呂祖謙字伯恭金華人宋尚書右丞好問之孫也其上  
世文靖公夷簡居壽州至右丞從駕南渡始居金華謙

之學本諸家庭得中原文獻之傳長從林之奇汪應辰  
胡憲游既又友張栻朱熹講索益精初廕補入官後舉  
進士復中博學宏詞科調宗學教授丁內艱居明招山  
四方之士多歸之除太學博士添差教授嚴州尋復召  
爲博士兼國史院編修實錄院檢討官輪對勸孝宗留  
意聖學及恢復大事召試館職嘗讀陸九淵文喜之而  
未識其人考試禮部得一卷曰此必江西小陸之文也  
揭示果然人服其精鑒父憂免喪主管台州崇道觀尋  
除秘書郎國史院編修實錄院檢討官以李燾薦重修

徽宗實錄書成進秩面對以治道體統及國家未備之制多所匡益以疾請祠歸先是奉詔編類皇朝文鑑至是書成除直秘閣主管武夷山冲祐觀明年除著作郎兼國史院編修官不就添差兩浙東路安撫司叅議官亦不就改主管亳州明道宮卒年四十五其學以關洛爲宗而旁稽載籍不見涯涘心氣平和不立崖異一時英偉卓犖之士皆歸心爲少稽急一日誦孔子言躬自厚而薄責於人不覺平時忿懣渙然冰釋朱晦庵嘗言學如伯恭方是能變化氣質其所講畫將以開物成務



既卧病而任重道遠之意不衰。居家之政皆可爲後世法。所註考定古周易書說圖範官箴辨志錄。顓陽公本末。呂氏家塾讀書大事記若干卷。弟祖儉編其雜文爲呂太史集及別集外集。凡三十餘卷。本其郡望東萊學者。稱爲東萊先生。

潘叔度先生

潘景憲字叔度。金華人。幼穎異。日誦數萬言。九歲以童子貢京師。通念十三書。說六經大義。作三體字。詔特試禮部。賜束帛。後入太學。一時學官如汪應辰芮燾王十

朋皆推重焉。登隆興元年進士。調荆門軍學教授。不行。  
請爲南岳祠官。秩滿。宰相知其賢。欲留官中都。力請太  
平州學教授。宰相問故。景憲曰。二親俱老。得遠次。尚可  
目從容其側。他非所望。宰相歎以爲不可及。與呂祖謙  
同榜。而齒長。聞其論說行身探道之意。慨然感悟。遂弃  
所學而學焉。遭父喪。廬墓三年。服除。遂不復仕。日游呂  
氏門。躬執弟子禮。誦詩讀書。旁貫諸史。而於程氏易尤  
盡心焉。旣又因祖謙以交於朱熹。往來講論。志同道合。  
遂以女妻其子。塋及卒。熹爲銘其墓。所著有記纂淵海。

詹體仁先生

詹儀之字體仁遂安人登紹興進士第乾道間張宣公  
守鄉郡呂成公分教儀之方家食日以問學爲事淳熙  
二年知信州時朱文公呂成公俱在鵞湖徃復問辯無  
虛日及帥廣東首以漁溪舊治立祠曲江上張宣公爲  
之記後論廣益官鬻之弊孝宗黜之除吏部侍郎知靜  
江府在任六年官鬻弊革未幾代者中以飛語遂有袁  
州之行光宗登極念儀之故官僚許自便旣歸而歿公  
論惜之

錢子是先生

錢時字子是淳安人游楊慈湖之門奇偉不羣讀書不爲世儒之習以易冠潛司旣而絕意科舉究明理學江東提刑袁甫作象山書院招主講席學者興起政事多所裨益其學大抵發明人心論議宏偉指摘痛快聞者皆有得焉丞相喬行簡知其賢特薦之朝且曰時夙負才識尤通世務田里之休戚利病當世之是非得失莫不詳究而熟知之不但通詩書守陳言而已授秘閣校勘詔守臣以時所著書來上未幾出佐浙東倉幕太史

李心傳奏召史館檢閱轉對敷陳剴切皆聖賢之精微旋以國史宏綱未畢求去授江東帥屬歸其書有周易釋傳尚書演義學詩管見春秋大旨四書管見兩漢筆記蜀阜集冠婚記百行冠冕集

徐誠叟先生

徐存字誠叟江山人未冠從楊龜山游隱居教授執經門下者千餘人秦檜欲識之不能得朱熹少時相與講明理學著有六經講義中庸論孟解其門人如周賁周孚柴衛西安鄭雍陸律常山江泳皆著名當時云

南溪柴與之先生

柴中行字與之。以儒學顯。登紹興庚戌進士。慶元中。調撫州推官。時有司薦舉以伊洛爲僞學。中行獨云。自幼習讀程氏易傳。如以爲僞。不願考校。士論壯之。後爲太學博士。屢遷至知贛州軍事。踰年。請老以歸。與弟中守中立講學南溪之上。時從游若東渭楊伯紀、雙峯饒伯與等數百人。因稱之曰南溪先生。卒。贈通議大夫、寶章閣待制。謚曰憲肅。

柴元振先生

柴禹聲字元振長臺人宣和辛丑同徐存受業於楊龜山學於毘陵時有潛心室伊川門人鄒柄爲之記推其師友淵源遠有端緒屢魁鄉薦學者宗焉紹興間高閑擢國子司業以禹聲堪克史館特薦於朝兄禹功晚亦游楊門扁其堂曰世學云

### 江邦直先生

江介字邦直開化人少穎異治舉子業一日讀程子書至水清性善之說大有感悟至衢從徐誠叟學復與朱晦翁相講明初任興國司戶叅軍陞進賢令歷官廣昌

安普數郡皆稱惠愛民爭繪像立祠未幾轉奉議郎卒  
於途所臨兩邑老稚涕泣羅拜道左或越境而後返晦  
翁志其墓

陳少南先生

陳鵬飛字少南永嘉人幼孤專志問學性簡重言動有  
則以經術教生徒常數百人其學不爲章句新說必本  
人倫正論而趨於深厚兩舉於鄉俱爲第一登紹興第  
調鄞簿召對爲太學博士改秩兼崇政殿說書遷禮部  
郎初秦檜子熈在永嘉從鵬飛學至是熈爲侍郎所下



文案多臆決不應令鵬飛每批其後還之煇浸不平及經筵講天王來歸惠公仲子之贈高宗忽問母以子貴何如鵬飛從容以正對謂公羊之說非是高宗愕然時檜欲尊崇太母以效容悅大怒諷言者劾鵬飛譏議慈寧典禮遂罷去繼以侍御史汪勃言謫惠州後四年卒淳熙末留正始爲開陳詔官其孫載有詩書解行於世羅浮集十卷

鄭景望先生

弟伯英伯海附

鄭伯熊字景望永嘉人德行夙成經學尤邃無一指不

本於仁義無一言不關於教化紹興十五年登第歷黃  
巖尉婺州司戶尤溪丞隆興初召試正字除太常博士  
稍遷吏部侍郎出爲福建提舉魏王判宣州南面坐受  
屬吏進謁幕府進劄子亦坐而可否之及伯熊除府司  
馬遂以劄子開說謙德未光嫌疑之際或駭觀聽又判  
罷吏羊綰再役伯熊引吏人年滿歸農不得再應募條  
法屢啓不從因自劾免朝廷知之改江西提刑奉祠起  
知婺州除吏部郎兼太子侍讀國子司業宗正少卿乞  
外以直龍圖閣知寧國府改建寧卒謚文肅伯熊自爲

館職不自陳年勞以求磨勘紹興末伊洛之學稍息學者復於伯熊得之有六經口義拾遺有類語若干卷皆究極本原達於事物有記聞若干卷前輩楷模及時人美惡凡涉理道者畢載由是永嘉之學宗鄭氏

弟伯英字景元剛介果決論事駿發隆興廷對第四人調秀州判官俄上印綬歸養三十年其學優於經濟見義必爲鄉里利病倡率興除不遂其志不止也

弟伯海字彥容紹興進士第授海門尉歷官制置司叅議授朝奉大夫卒於官伯海持身廉慎家居立義塾延

理學  
師訓生徒五百餘人至今名其里曰學堂前所居距文  
肅百餘步時人稱東西二鄭云

薛士龍先生

薛李宣字士龍永嘉人六歲而孤從世父弼宦游及見  
故老聞吳興初將相趙張韓岳諸公事遂有當世志每  
樂道其人年十七荆帥孫汝翼諗其才辟機宜文字妻  
以女孫氏家多書一意緝繹隱君子袁沈授以伊川程  
氏學益自斂制克養紹興末調武昌令金人敗盟有端  
季宣先事而薦訪求河北陝西弓箭手保甲制度行之

縣境訓練賞罰皆有法則由是武昌保甲爲勝兵移書  
訣親友誓以死守金兵自襄還圍蔣州甚急樞密汪澈  
宣諭上流召季宣問策曰以蔡州要害得蔡蔣圍自解  
果如其言其東道兵薄合肥二三大將退却復建議自  
蔡乘勝拔許昌向陳汝則廬兵不戰可屈亦如其言召  
對除大理簿與丞相盧允文議多不合奏遣奉使淮西  
措置流民將還復命覆麥田又命視鐵冶歸還兩官除  
寺正入對所薦士多旌擢大臣滋不悅丐外守湖州七  
日卽自免橐鮑若雨故宅以居起知常州未上卒年四

十終奉議郎後謚文憲其學本於六經講明堯舜三代治法本末甚詳士不可以經學爲空談自季宣始有詩性情說書古文訓春秋經解旨要大學說論語小學通鑑約說漢兵制九州圖志及校讐陰符山海經等書

王龜齡先生

王十朋字龜齡樂清人少穎悟日誦數千言稍長操筆已有憂世拯民之志通六經尤長於春秋聚徒梅溪從游以百數入太學名譽藉甚紹興丁巳以上舍廷對萬言高宗覽而異之親擢爲第一宸翰褒之曰經學淹通

議論醇正是日詔天下毋得以金翠爲飾遠方所獻翠羽悉燔之用對策語也簽書鎮東軍判官除校書郎兼建王府小學教授金人敗盟入對言禦戎莫急於用人用人莫先於人望乞急用張浚劉鋹又論楊存中以管軍領三公名器濫極清資加於喻伍高爵濫於醫門統師剝下賂上結怨三軍道路捕人爲卒結怨百姓上大感悟及金兵入境卒起浚鋹如其言孝宗卽位屢遷起居舍人兼侍講尋除侍御史力贊北征之計沮於異議徙吏部侍郎不拜出知饒州究心撫字恩惠周流鎮饒

州饒民丐留不可至斷橋截路十朋從間道去治夔期  
年改知湖州去夔如去饒戶部責虛逋三十四萬告不  
可卽丐祠州人送越境涕泣而返起知泉州以治績進  
敷文閣直學士泉民爲立祠凡四郡之政光絕一時召  
爲太子詹事旣至對選德殿以足弱給扶減拜賜坐從  
容就賜鞍帶俄疾作連章告老以龍圖閣學士致仕有  
大星隕於故居命下而卒命漕臣典喪事謚忠文十朋  
之學一出於正自孔孟而下惟韓文公歐陽公司馬公  
是師故其文粹然有春秋尚書論語解梅溪集



俞季淵先生

俞浙字季淵新昌人登進士歷監察御史三疏時事皆忤旨不報改大理少卿不就乃浩然歸閉門著述有六經審問離騷審問及韓文舉隅諸集浙爲人寡言篤行端矩縵蕭衣冠不喜馳騫與石塾黃度先後發明理學尤崇尚朱熹傳註所得良多晚年深察而拓克之以求合中庸之旨自號致曲老人

黃仲庸先生

黃中字仲庸平陽人學以關洛爲宗錢文子一見期以

國士登紹興第。歷館閣。累遷起居舍人。兼侍講。出知袁州。泉州。以右文殿修撰卒。中以進士第三人中第。越三十載。居官僅十考。故得大肆其力於學。與朱晦庵往復講論。欲於實地用工。不徒託之空言而已。嘗校藝漕闈。時學禁方嚴。中發策有云。平居不以利祿入其心。而培植涵養如木有根。水有源。用之則竭。旣倒之狂瀾。不用則唱和寂寞之濱。亦足以名世。任此責者誰與晦庵後見之曰。近年若此等議論。令人歎服。初人經筵。寧宗曰。朕正賴卿輔佐。語之再三。中前後三十餘疏。傾心忠梗。

無所回撓。魏了翁以爲古之遺直。

陳叔向先生

陳葵字叔向，青田人。自少篤學，至老不倦。舉隆興進士，知平陽縣。居官廉介，父病不解衣數月，兄弟相友愛。闢事魏益之，因教以盡弃所懷，獨立於物之表。未久，忽大悟。洪纖大小，高下曲直，若有見焉。且疑呂伯恭讀書徒多，朱元晦修方不療時政，又嘗自言用功益難進道愈遠。古人今人皆未可輕議。晦翁每重其學術，士有志者必使往從之，曰：「可以寡過。」又與其子在書曰：「過青田不。」

可。不。見。陳。叔。向。也。其。爲。時。所。欽。嚮。如。此。

陳止齋先生

陳傳良字君舉瑞安人年未三十心思挺出新語憇長學者駭未曾有由是文名擅天下授徒仙巖四方景從薛季宣訪之問以所安傳良曰毋不敬季宣曰比參倚何如傳良釋然有省乃謝去舊學從季宣於漏上閱數歲盡得其本末遂以斯文爲已任乾道八年廷對文過西漢議論過之殿臚定爲第一旣而不果調泰州教授未上除太學錄因議科舉法不合出通判福州知桂陽

軍召爲吏部郎入見光宗迎勞曰卿昔安在朕思見卿  
久矣其以所著書示朕退以周禮說上除秘書監兼嘉  
王府贊讀遷左史兼中書舍人會光宗疾作久闕南內  
定省中外切諫一日得旨過宮百僚班候光宗已出御  
屏慈懿后復挽入傅良引裾請母入至御屏後后叱之  
傅良哭於庭后遣人問之曰此何理也對曰以子諫父  
不聽則號泣而隨之后益怒傅良下殿不返舍徑出國  
門寧宗卽位召爲中書舍人會黨論起遂奉祠久之起  
知泉州以疾辭除寶謨閣待制卒謚文節傅良旣受學

於薛季宣已而入太學尚友張呂凡諸儒所講克已兢畏敏德氣義之說及文獻相承所以垂世立國者傳良得之猶蒐斷簡采異聞一事一物必稽其極而後止千載之上珠貫繩聯若目見而身折旋其間呂伯恭以爲長不獨在文字也其操術精而致用遠施爲不竟惜哉所著有周禮說春秋後傳左氏章句毛氏詩解詁讀書譜建隆編止齋文集學者至今稱止齋先生

慈湖楊敬仲允生

楊簡字敬仲慈谿人清明純一非禮不動燕私儼恪如

席君師學以古聖爲的人太學第進士主高陽簿日坐公堂輒諷詠魯論孝經不動聲色而民自化陸九淵道其邑齒長二歲指以心學之要遂北面師事焉調紹興府理掾朱熹持庾節首薦之每稱簡學有爲已功夫宰饒之樂平謂教養茲邑欲使邑人皆爲君子況學者乎誨之諄諄不倦爲講堂訓曰學者孝而已矣時有古今道無古今性無古今聞者興起以國子博士召講易乾卦發人心固有之妙趙汝愚免相祭酒李祥抗疏辯之簡上書亦以學黨斥聞居十三年以秘書召遷著作將

作少監守溫州訪賢者禮致之崇孝養明宗族相恤之  
令首行鄉舉倣周官敬敏任恤之類書善不書惡除工  
部郎將作監告老奉祠召不起終敷文閣直學士以寶  
謨閣學士致仕壽八十六謚曰文元有詩易春秋論語  
古文孝經傳孔子閒居解簡至誠篤敬期功之賦下洎  
總麻一以經禮爲則而容色稱之平居接物從容和樂  
未始苟異於人而高遠自不可及北方傳誦其文曰此  
江南楊夫子也

袁和叔先生

子甫附



袁燮字和叔鄞人生而端粹專靜乳姐置槃水其前玩  
視終日夜卧常惺然稍長讀東都黨錮傳輒以名節自  
期入太學見陸九齡遂師事之同里沈煥楊簡舒璘皆  
聚於學朝夕以道義切磨第進士爲太學正時名儒朱  
熹輩皆斥燮知不爲時所容尋以學黨去更歷外服入  
朝至太常丞兼考功郎知江州提舉江西常平以都官  
郎召遷司封又遷國子司業祭酒延見諸生廸以切已  
之學聞者興起以秘書監兼崇政殿說書遷禮部侍郎  
侍講兼祭酒每講必託義以諷立朝守正不阿議者指

爲好名遂奉祠以歸著述弗倦或勸宜少休曰吾以此爲笙鏞管磬不知其勞也終顯謨閣學士贈龍圖閣學士謚曰正獻嘗曰此心存則雖賤而可貴不存則雖貴而可賤吾心與天地一本精思以得之兢業以守之則與天地相似每謂爲學當以聖賢自期仕宦當以將相自任其所講明體用兼綜於詩禮論說尤詳成就後學甚衆子甫進士第一爲兵部尚書國子祭酒亦稱名儒

沈晦叔先生

沈煥字晦叔自定海徙鄞偉儀貌尊瞻視音吐鴻暢羣

居鄉校以嚴見憚入太學行藝優諸生始與臨川陸九齡爲友一日盡舍所學師事焉晝夜鞭策務本趨實不自矜衒第進士講學不倦自以資稟剛勁非所以懽庭聞大書深愛和氣愉色婉容數語於壁日觀省焉門人弟子決疑請益者自遠而至啓告簡嚴中心悅服師道益尊爲太學錄修教養法士爭歸之不詭隨苟容以取光寵遂補外終於舒州通判煥非聖哲書未嘗誦習與朱文公呂成公問辯凡世變推移治道體統明君賢臣經綸事業孳孳講求日益深廣追贈直文華閣特謚曰

端獻

藝堂湯達可先生

湯建字達可。樂清人。少爲陳傅良所知。天文地理古今制度考覈精詳。洞達本末。遂棄舉子業。篤意兢省。深造理窟。始以其學授徒。名儒達宦多受業焉。尊曰藝堂先生。每夙興必齋沐。讀易一卦。退與友朋商論。欣欣自得。有古瑟嘗鼓以自娛。年踰八十卒。所著有詩衍義論語道德經解。

林景文先生

林武字景文永嘉人少勤敏力學博通經史斟酌理學淵源朱晦庵講道武夷武徒步往從之親受中庸衣錦之旨歸而扁其堂曰尚綱且輯平日所聞爲語錄數帙後以恩科入官授河池縣尉考滿廣漕交辟不就性度冲約出於自然父老跼步不離親前中衣躬掖卧起旣艱毀瘠幾不能終喪歲歉以私惠及遠邇鄉曲期以其後必大旣而子賀孫終相繼登科說者以爲入道有知云

南坡葉茂叔先生

葉秀發字茂叔金華人師事呂祖謙深於性理之學擢慶元丙辰進士授福州長溪簿轉慶元府學教授嘗著論語講義發越新意以誨諸弟子一時鉅儒如樓煥史彌華婁昉鄭性之袁燮楊簡皆相器重願與之交而於簡問難尤詳簡每自謂得所啓發秩滿調桐城丞金人犯蘄黃桐爲隣壤人凜凜不自保騎兵將迫家人號泣求避秀發叱之曰此正臣子竭力致身之日也雖死何憾苟先去之如一城生聚何修城濬濠日爲備禦計會金人使諜者至秀發擒之亟斬以徇金人計沮不敢近

邑賴以完。制閫忌其功不自已出。上其擅斬。貶秩未幾。  
論奪。秀發退居十餘年。無一毫缺望。意史彌遠當國。有  
自桐城來者。歷言秀發撫綏安定之詳。且言某等得保  
首領至今。皆葉丞之賜。不然已無桐城久矣。遂擢知揚  
子縣。遷知高郵軍。高郵爲淮東緊治。時尚驛騷。秀發上  
五策。曰。防海道。審邊備。擇武守。練軍實。蓄財用。而以作  
人心。正士氣爲之本。所言多聽。築高沙三十六湖。建石  
碛以疏水勢。陂澮有恒。無乾溢之患。其後馬光祖來爲  
守。行碛上。思秀發之功。構堂樊澤之隄以祀焉。卒年七

十餘所著有易說周禮說論語講義行於世學者尊曰  
南坡先生

崑隱戴少望先生

戴溪字少望永嘉人少築精舍崑岡與王柵讀書其中  
盡通諸經聲名日起江浙之士從游者數百人登淳熙  
策數歷中外最後由大司成登從橐遂兼詹事以經學  
輔景獻太子家有明經堂太子親書其扁終工部尚書  
以翼贊恩贈端明殿學士謚文端溪性行純明平實簡  
易求聖賢用心不爲新奇可喜之說而識者服其爲理



到之言嘗與朱晦庵遇於旅邸時從晦庵行者衆溪謂  
之曰不畏鉤黨之禍乎晦庵矍然散遣之嘉定更化朝  
論將取晦昔奸黨盡投嶺海溪獨援紹興往事恐貽君  
子小人翻覆之禍議遂寢所著有易詩春秋說語孟答  
問通鑑筆議將儘復嘗對崑隱文集學者至今稱崑隱  
先生

葉水心先生

葉適字正則其先括蒼人徙永嘉資稟茂異風度澄肅  
卅角記誦如流十歲能屬文淳熙廷對第二人除太學

正遷博士朱晦庵爲林栗所論適上疏言栗非是知衡  
州一以靜治處士李之翰居中州通性命之學適每款  
門相與切劘入爲吏部郎孝宗升遐光宗以疾不能執  
喪適贊趙汝愚請嘉王參決宗社底定遷司業兩學相  
慶符師除淮西總領罷知泉州久之以工部侍郎召徙  
吏部兼直院不拜以實謨閣待制守金陵引疾請祠里  
居十有五年累進寶文閣學士卒年七十四謚文定適  
生平喜讀書不以世務萦懷考論古今品藻人物自成  
一家言名重當世四方學者仰之如山斗咸稱水心先

生遠而高。句麗捐金帛。購求其文。有習學記言。荀楊問答外。藁有水心進卷。竝行於世。

周子靖先生

周端朝字子靖。行已族孫。仲父去非登科。爲張南軒高弟。端朝少淹貫。爲業適所知。繼從朱氏於武夷。而業益進。紹熙中。入太學。趙汝愚爲李沐所攻。罷相。端朝與同舍生楊宏中等。上疏救之。得罪。羈信州。久之。放便時。號六君子。登嘉定第。調桂陽軍教授。首立濂溪祠於學。以示標準。秩滿。除太學錄。遷博士。入對。言人主之學。與士

大夫之學不同士大夫一心之存亡繫於一身之是非  
人主一念操舍驟開天下之休戚除太常兼司封郎又  
之以軍器監兼司業居數月遷秘書少監兼侍講復官  
近歲經筵例成兼職令抱道篤學之士列在庶官守道  
不苟之賢栖置散地乞廣加收召以備其選於是蔣重  
珍徐清叟葉味道相繼進用端平初時相怵於浮議遽  
興三京之師端朝力言其不可旣而師徒撓敗卒如所  
料除權刑部侍郎卒謚文忠端朝儀容莊靜心事和平  
內行純備居喪執禮黃冠釋子未嘗及門有田半頃盡

歸其允一室蕭然不顧也。賓紹間權門熏灼端朝侃侃守正不可親晚方進用未得少行其志士論惜之。

郎晦之先生

郎曄字晦之錢塘人從學於張九成嘗編橫浦日新錄以儒學知名或謂曄世系與侍郎郎簡同譜曄曰我家白屋豈可妄扳華胄識者許之淳熙十四年特奏得官未任卒

劉子宣先生

劉炎字子宣少侍父遜齋先生習聞庭訓專事程朱之

學因慶元黨藉隱居不仕從真文忠辭著劉子通言十  
二卷其略謂中天地而立與天地參者人也人之性天  
地之性也孔子以爲貴孟子以爲善天地予人之正也  
君子保天命之性之謂仁成天命之性之謂學其言行  
於世

舒元質先生

舒璘字元質奉化人雅有大志耻以一善自名篤實不  
欺無毫髮矯僞入太學師張栻又從陸九淵朱熹及呂  
祖謙兄弟講習力於躬行嘗曰非能一蹴入其域刻苦

唐屬改過遷善日有新得亦可以勿畔云爾第進士教  
授徽州以身率多士日詣學寒暑不懈暮夜亦間往勸  
誘啓迪質或不美未嘗忿疾需其自新作詩禮講解以  
授諸生徽人追思之曰吾鄉學問之源室而復通者先  
生實開之因祠於學璘信道甚篤利祿之念不萌宰平  
陽臨政聽斷人服其平終於宜州通判淳祐中特謚曰  
文靖

山堂章俊卿先生

章如愚字俊卿金華人自幼穎悟潛心理學登慶元丙

辰進士與真德秀同榜累官國子博士未幾改知貴州政績大著開禧初被召上疏極陳時政因忤韓侂冑罷秩歸結草堂山中與士子講學遠近咸師尊之稱曰山堂先生所著有羣書考索六十六卷文集若干卷

### 李從仲先生

李大同字從仲東陽人學於朱熹之門鄉貢入太學年六十講學益力登嘉定進士第由郡教授爲國子博士對詞意激烈上嘉獎之累遷右正言兼侍講首陳謹獨之戒謂人主燕閒敬畏之心易縱莊敬之容易弛情



飲一肆如水橫流而莫之遏况復有宦寺之屬窺伺歡  
娛導淫勸侈以蠱上心竊弄威福上爲之改容遷太常  
少卿除侍御史其言不激不隨斥去黨論善類皆推其  
深識與真德秀同在經筵德秀進講大學言此心當如  
明鏡止水不可作槁木死灰大同謂不可二字未安蓋  
此心自是活物豈當作槁木死灰德秀歎服時喬行簡  
獨當國以親嫌累疏乞外遷刑部侍郎兼修國史進工  
部尚書以寶謨閣直學士知平江府乞祠提舉太平興  
國宮卒年八十七大同資稟純厚神氣清和端行拱立

望之使人意消。至於忠言嘉謨。上裨緝熙。下濟蒼生。嘉  
熙端平之治。大同之助。爲多。所著有詩文十五卷。奏議  
十卷。羣書就正六卷。羣經講議十五卷。通鑑隨錄六卷。  
唐事類編二卷。

舩山楊子權先生

楊與立字子權。本蒲城人。受業朱子之門。嘗知遂昌縣。  
因家於蘭谿。以道淑人。學者多宗之。稱爲舩山先生。所  
輯有朱子語略二十卷。其幽居詩云。柴門闌寂。少人過。  
晝日觀書。口自哦。餘地不妨栽竹木。放教啼鳥往來多。

溪頭詩云溪頭石磴坐盤桓時見脩鱗自往還可是水  
深思極樂不須妄意要投竿吳師道云有道之言意象  
自別頗與會語相關窓草不除意同北山何基魯齋王  
栢皆嘗訪道於先生先生一見北山而稱許之由是盤  
溪之從游始盛魯齋亦有就正於樞堂船山麓議伊洛  
淵源之語

傳貽輔漢卿先生

輔廣字漢卿崇德人淳謹勤恪少讀濂洛書慨然願學  
從呂祖謙游後師事朱熹與黃幹竝稱爲學禁與蔡元

定既死。廣獨侍。無不去。入京師。居太學南。集同志講學。不懷堅忍。篤信終始。不渝主崇德學事。以師友淵源。倡率其徒。會扁其堂。傳貽學者。稱傳貽先生。所著有論孟谷問。六經集解。詩等童子問。通鑑集義。日新雜文。子大章舉進士。

徐崇甫先生

徐偁字崇甫。其先諸暨人。有祖官吳越爲常侍。始遷於義烏之龍波。從學於呂祖謙門人葉邦登。淳熙進士第。調上饒簿。始受業朱熹之門。熹稱其明白剛直。命以教。

名齊歷紹興南康司法皆以憂去服除累官提舉江南  
東路常平茶鹽事上書極言朝廷時政請詔大臣以正  
已之道正人憂家之意憂國庶幾致安於已危迂治於  
將亂丞相史彌遠怒令言者劾罷之理宗卽位禮部待  
郎真德秀奏寬直敢言如徐僑者願置之言地時彌遠  
猶在相位不報葛洪喬行簡代爲請祠迄不受祿遂引  
年告老紹定六年朝廷更化收用老成除直寶謨閣江  
東提刑尋除秘書少監改太常少卿屢辭逾年始入覲  
手疏數千言皆感憤慨切上爲竦聽顧見其衣垢屨弊

愀然謂曰卿何貧甚耶對曰臣不貧陛下乃貧耳上曰朕何謂貧對曰陛下國本未建疆宇日蹙催倖用事將帥非材旱蝗相仍盜賊竝起經用無藝帑藏空虛民困於橫歛軍怨於倍尅羣臣養高而天子孤立國勢阽危而陛下不悟臣不貧陛下乃貧耳又言女謁閹宦表裏用事帝爲之感動改容咨嗟明日手詔罷邊帥之尤無狀者申儆羣臣以朋黨爲之戒命有司裁節中外浮費而賜金帛甚厚僑臣辭不受除兼侍講尋兼權國子祭酒勸講之際開陳友愛大義遂復皇子竑爵且建言

子思宜配享孔子二程子宜列從祀王安石宜廢勿祀  
趙汝愚宜配享寧宗帝皆如其請論王概使事僑以既  
無國書則非正使宜館之於外如晉叔向辭鄭故事與  
時宰論不合力求去帝諭留甚勤遷工部侍郎求去益  
堅陞集英殿修撰提舉佑神觀兼侍讀僑奏領祠勅讀  
乃體貌重臣之殊禮力辭不敢當遂以寶謨閣待制奉  
祠卒年七十八謚文靖所著有讀易記三卷讀詩記詠  
一卷雜說一卷文集若干卷子錄鈞鑄皆傳其家學以  
世實入官

葉成父先生

葉由庚字成父。義烏人。生而口吃。嗜讀書。習春秋爲舉子業。試有司不中。遂絕意進取。時徐僑倡明朱熹之學。由庚執經從之。僑授以中誠仁命性心六字之說。由庚晝夜磨礪。探窮經旨。驗之於躬行。期凝合而無間。僑謂人曰。成父從僑最久。靜慮無他好。講學意趣殊深。吾道爲有所託矣。遂以通名其齋。且戒之曰。心體之流行。卽天運之流行也。無乎不通。而塞之人其物矣。由庚佩之終身。金華何基王栢皆宗於熹。學次第相傳。遠有端緒。



皆慕由庚造詣真切。相與贈書辯析至無虛月。基相皆  
深服其言。嘗謂古人知行並進。聞一善言。見一善行。未  
之能行。唯恐有聞。若纏藏於文字間。待其知至而後行。  
是終無可行之日也。人以爲名言。平生不務著書。惟研  
述洛諸儒之說。以教人。僅有論語纂遺若干卷。詩文若  
千卷。精爽自誌一卷。藏於家。

西山葉知道先生

葉味道字知道。初名賀孫。自括蒼徙永嘉。早從朱晦庵  
於武夷山中。學禁開登嘉定進士。理宗朝。遷宗學教授。

上言人主之務學。天下之福也。必堅志氣。以守所學。謹  
幾微。以驗所學。正綱常。以勵所學。用忠言。以克所學。又  
述帝王傳心之要。與四代作歌作銘之旨。帝一日忽問  
伯有之事。味道對曰。陰陽二氣之聚散。一定而不易者  
其常也。不得其死。而鬱結不散者。其變也。伯有得罪而  
死。其氣不散。於是爲之立子浹。以奉其後。蓋諷皇子竦  
之事云。味道在經筵。凡所講說。敷陳無一言不切君身。  
無一事不關治道。議者推服。除秘書郎。兼工部郎。卒。景  
定間。門人范東叟爲請謚曰文修。學者尊爲西山先生。

著有四書說儀禮解經筵講議輯次朱氏語錄四十三卷。

西山真希元先生

真德秀字希元。生於西山。既壯徙浦城。由進士博學宏詞。科累官起居舍人。史彌遠得政。力乞補外。除秘閣修撰。江東運副。改知泉州。歷知隆興。江西。湖南。安撫。理宗立。召爲中書舍人。兼侍讀。擢禮部侍郎直學士。兼國史院修撰。嘗因經筵進說曰。惟學可以明此心。惟敬可以存此心。惟親君子可以維持此心。每進鯁言。上皆虛受。

彌遠諷言官論罷之。紹定中，起爲徽猷閣待制，知泉州。改福建安撫使，知福州事。尋召爲戶部尚書，辭不允。除翰林學士，知制誥兼侍讀，拜參知政事。踰月，以疾丐祠，以資政殿學士提舉萬壽宮。卒，謚文忠。學者至今稱西山先生，邇其所生也。

潛室陳器之先生

錢木之徐寓徐容附

陳埴字器之，永嘉人。父燁，字民表，工屬文，善持論，爲水心葉適所推。三子增埴、止善，皆登科。埴少穎悟，父從朱氏於武夷，所見超卓。紹定間，江淮制置趙善湘建明道

書院辟埴幹辦公事兼主講席四方學者從游數百人  
尊爲潛室先生後以通直郎致仕卒同時郡人若錢木  
之徐寓與弟容俱從朱氏學而臯比之尊輒以推埴焉  
著有禹貢辯洪範解王制章句木鐘集

北山何子恭先生

何基字子恭金華人賦性端凝夙有遠志少從鄉先達  
陳震習舉子業課程若不得已而潛心義理之功居多  
旣冠侍其父伯慧爲臨川丞適勉齋黃幹爲令遂師事  
焉幹教以必有真實心地刻苦工夫而後可基懷然受

命始聞伊洛淵源之懿。臨別告以熟讀四書。使習次。決  
洽道理。自見。遂終身服習。頃刻不忘。一室危坐。萬卷橫  
陳。每於聖賢微辭奧義。有疑而未釋者。必平心易氣。勿  
忘勿助。待其自然貫通。不立異以爲高。不徇人而少變。  
克其所知。而反之於身。無不允踐。其實。船山楊與立一  
見推服。由是學者爭趨焉。王相旣執贇爲弟子。基謙抑。  
不以師道自處。相高明絕識。序正諸經。弘論英辯。質其  
難疑。或一事至十往返。基終不變。以待其定。嘗曰。治經  
當謹守精玩。不必多起疑論。有欲爲後學言者。謹之又

謹可也。平生聞一善言，見一善行，喜形於色。若已有之，或聞朝有關政四方有警，輒惻然不樂。至忘寢食，隱居求志，不顧人知。真無媿古人爲己之學。郡守趙汝勝蔡紹楊棟相繼聘主麗澤書院，皆辭不就。景定五年，與建人徐幾同被特薦，添差婺州教授，兼麗澤山長。力辭度宗立，授史館校勘，兼崇政殿說書。又頒詔劄，敦勉備至，辭益力。特改承務郎，主管南嶽廟，使食其祿以遂高志。然亦終不受也。咸平四年卒，年八十一。平生不著述，惟研究考亭之遺書而已。居北山盤溪之上，學者稱爲北山先生。

理學

卷之三

川王

光緒堂

山先生國子祭酒楊文仲請於朝賜謚文定

王會之先生

王栢字會之金華人祖師愈從楊時受易論語後與朱熹張栻呂祖謙游父瀚與其叔季執經朱呂之門栢生稟高明抱身宏偉少慕諸葛武侯之爲人自號長嘯年踰三十始知家學之原慨然捐去俗學以求道與其友汪開之讀四書取論孟集義別以鉛黃朱墨以求文公去取之意著論語通旨至居處恭執事敬惕然歎曰長嘯非聖門持敬之道亟更以魯齋歷造楊船山劉樞堂



而卒業北山焉。北山授以立志居敬之旨，且作魯齋箴，勉以質實堅苦之學。有疑必從北山質之，自著敬齋箴，圖畫出一敬字爲日用躬行之則。夙興見廟，治家嚴飭，當暑閉閣靜坐，子弟白事非衣冠不見也。四方來學者衆，隨其所學淺深，引誘啓迪，以開其適道之門。提綱扼目，折殊會一，未嘗不竭盡無餘。又編朱子指要示之士大夫，叩請者每語之曰：「士生天地間，以萬物皆備之身，而不以古今自任，經綸自期者，皆自遏其躬而已。」郡守趙汝勝、蔡抗、楊棟相繼聘主麗澤講席，台守謝景緯又

聘爲上蔡書院師。首講謝子大居敬貴窮理之旨。敷暢瑩白。聽者竦然。意融心服。雖鄉之耆德亦執弟子禮來謁。旣歸。講道於家。學子懷慕不遠數百里相從。弗置。晚年積厚養固。精強清勁。雖少壯勿逮。孜孜述作。殆不知老之將至。咸淳十年七月一夕無疾而終。年七十有八。其爲人學博而義精。心平而識遠。考訂羣書如于將莫邪。所向肯綮。迎刃而解。凡朱子發端而未竟。疑而未決。與諸儒先闡明之未及者。莫不該攝融會。權衡裁斷。如論河圖洛書。九疇洪範。及詩大學格致章中庸古本。皆

卓識獨見至天文地志律曆井田旁及文章字學莫不各有論著多不備載國子祭酒楊文仲請於朝謚曰文憲

徑暇徐景說先生

徐霖字景說西安人幼穎異年十三卽有志聖人之道研精六經以探其要淳祐試南省第一人及第後授沅州教未赴時宰臣史嵩之姦邪顯國霖上疏力言之無何嵩之以父喪去上思霖言召試館職論國大計甚激切除秘書省正字再除校書郎以言不行去朝廷再三

挽留不可歸。借屋以居。讀書養親。裕如也。郡守游鉤買田築學舍。請霖講學。遠近之士裹糧來游者三千餘人。朝旨特改官。通判常州。除秘書著作左郎。通判信州。皆不赴。未幾除兼國史編脩官。實錄院檢討。拜命引見。奏言萬化之本在心。存心之法在敬。上獎諭再三。除崇政殿說書。上嘉其直。有大用意。是月兼權左司。自是小人中以巧計而謾言入矣。乞補外。差知撫州。獎士類寬民力。誅悍將。人情悅服。視事一月。以譴黜。士民攀臥車幾不行。寶祐改元。差知衡州。二年改劔南。皆不起。又改

袁州丁父憂哀毀過制疾作卒年四十八。天質既高學力又到由尸居以達日用本末具備平居與人言低聲下氣至於處官立朝則忠肝義膽奮不顧身貴育不能奪晚年閒居既久涵養益深不及大用以死命也有太極圖說遺稿五十卷學者稱爲徑畝先生。

趙德父先生

趙景緯字德父於潛人少勤學弱冠得周程諸書讀之後往來葉味道度正之間以求放心爲本所索益精登淳祐進士第授江陰軍教授丁母憂以祿不逮養服闋

不調作讀書庵。懸雷山每進華秩必固。辭歷知台州。兩  
辭不赴。趙命益嚴。至郡以化民成俗爲先。務取陳述古  
論俗文書示諸邑。及孝經庶人章爲四言。詠贊其義。使  
朝夕歌之。至有爲之感泣者。建黃巖社倉六十有六。其  
諸善政不可殫載。進考功郎。四辭新命。且乞於赤城桐  
栢之間採藥著書。不許。御批兼崇政殿說書。三辭而後  
遣朝。侍緝熙殿以易進講。又論監司守令舉刺不當。不  
足以服天下之心。彗出於柳。應詔上封事。拜太府少卿。  
以直敷文閣。知嘉興府。辭。乞奉祠。不許。拜宗正少卿。兼

侍講乞祠還家。御筆趣行。除兼權工部侍郎。又命兼權中書舍人。三辭不許。封還。濫恩詞頭。帝從之。進權禮部侍郎。兼修玉牒。再辭不許。進聖學四箴。授集賢殿修撰。知建寧府。召爲中書舍人。進顯文閣待制。乞祠。遂差提舉王隆萬壽宮。未幾疾作。謝醫却藥。曰。使我清心。以順天命。毋重惱我。懷拱手三揖而卒。詔特贈四官。至中奉大夫。謚文安。

車清臣先生

車若水字清臣。黃巖人。初事陳貧窶者。卿學古文。其祖

陸軒先生不悅也。乃從清獻杜公游。始大有得。遂潛心性理之學。嘗欲取大學知止有定一節。合聽訟章爲格物致知傳。金華王魯齋聞之。以爲洞照千古之錯簡。使朱子聞之。亦當爲之莞爾一笑。又嘗著道統錄。宇宙略記。與亢菴諸書。皆行於世。

康敏黃立道先生

黃超然字立道。號壽雲。黃巖人。與車王峯往來。金華王魯齋之門。得理學之傳。而尤精於易。晚卒。賜謚康敏。其謚議曰。故壽雲先生黃超然。以文肅華胄。詩禮名家。學



貫六經尤邃於易安居恬靜不以貧窶動其心性謙高  
明不以功名易其志以博達之才道德之化漸於鄉里  
也逮淵源之學仁義之教被於後人也深故旣歿而名  
益彰所著周易通義等書皆能羽翼程朱開明後進是  
宜於設教之所錫以書院之號禮所謂鄉先生沒而可  
祭於社者公實有焉定議易名國有令典按謚法壽考  
且寧曰康好古不怠曰敏請謚康敏

庶善翁如山先生

翁巖壽字如山初名夔永嘉人登淳祐第調永州教授

未上丁母憂服闕授寧國軍書記除太常博士遷國子  
丞知興化軍卒。壽性行純固德容晬然從陳埴最久  
微言與義盡得其傳退而私淑其里學者日衆常令諸  
生讀近思錄曰此讀書之梯級也又令觀言行錄曰此  
爲人之標準也其學以修身勵行爲務不專在言語文  
字學者尊稱曰庶善先生。

張伯誠先生

張潤之字伯誠蘭谿王益人游北山何文定公之門餘  
三十年盡得北山之學北山之葬也潤之爲定士禮不

用品官之儀以成其志。北山輯近思錄發揮未就而卒。  
仁山金履祥繼成其書，每條皆質於潤之，而後定。晚歲  
避亂居金華山中，蓋有桃源之思焉。白雲許謙稱之曰：  
先生之德，篤實清介，問學專力於經。其季龍泉公蚤世，  
訓其遺孤，而經紀其家，且衣食之。先生長仁山二十年，  
爲同門先達，平居商略討論，情好最密，他人不及也。先  
生被服樸略，人視之巖谷一叟耳。而天機駿利，襟度融  
朗，有浴沂詠歸氣象。彼以貌觀先生者，豈知德哉。

仁山金吉父先生

金履祥字吉父蘭谿人少而好學有經世志凡天文地  
形禮樂刑法田乘兵謀陰陽律曆之書靡不研究其微  
而克極於用年十九知向漁洛之學遂弃舉子業師魯  
齋王文憲公問爲學之要魯齋舉何文定公立志居敬  
之說同讀書之目曰自四書始又從魯齋登北山之門  
北山曰會之屢言賢者之賢便自今日截斷爲人田是  
講貫愈精造詣益邃往來二公間何示以省察克治王  
示以涵養克拓語雖甚約履祥服之終身嘗若有未盡  
焉當時議者謂何之清介純實似尹和靖王之高明剛

正似謝上蔡履祥則親得之二氏而並克於已者也履祥在宋季嘗以布衣游公卿間間進牽制擣虛之策時不能用及國勢以危始思其言以史館編校召之已不及於用矣旁郡嚴陵有釣臺書院郡守以文憲上蔡故事聘爲之一出舉子陵懷仁輔義之說摘發仁義之蘊學者始知有義理之學晚歲築居仁山之下講道著書以淑後進諄諄不倦言論風旨皆可誦法學者不敢字之稱仁山先生所著有尚書表註大學指義疏義論孟考證通鑑前編行於世

劉習甫先生

劉漢傳字習甫上虞人少孤力學弱冠貢於鄉以祿弗  
遠親絕意仕進沉潛伊洛之旨往見雲源何先生得建  
安二蔡易洪範之學先生授以與旨且勉之仕年四十  
六始舉進士主黃梅簿三仕至監都進奏院陛對條列  
廣聖學闢異端伸直氣恤民隱四事又遷司農丞守南  
康知吉州皆有善政及兼江西提舉時大江失險虜兵  
逼境人心震搖漢傳嚴談警備簡精銳遮要害民賴以  
安嗣書嘉獎除直寶謨閣尋知處州累遷兩浙運使吏

部郎官與尚書右銓進司農卿皆力辭自是閒居十一  
載篤學守道嘗著止善集通鑑會評洪範奧旨若干卷  
臨終索筆書生爲宋民死爲宋鬼樂哉斯丘北足行矣  
之句遺二子遂瞑年七十六

黃東發先生

黃震字東發慈谿人中進士第爲吳縣尉有能名後爲  
史館檢閱入對言危亡災異在旦夕而緇黃出入宮禁  
無節失朝廷體度宗大怒批降三秩卽出國門用諫官  
言得通判廣德軍時社倉法大弊衆以始自朱熹不敢

議震曰法出於聖人猶有變通安有先儒爲法遂不得  
救其弊邪爲別買田六百畝以其租代社倉息非凶年  
不得輒貸貸不取息定爲法時郡將賈蕃世以權相縱  
子驕縱不法震數與爭論是非蕃世積不堪疏震撓政  
解官尋判紹興撫州飢起震知其州單車疾馳中道約  
富人耆老以某日集城中過期者罰至則大書閉糴者  
藉強糴者斬揭於市不抑米價價爲日損坐驛舍署文  
書不入州治親煮粥食餓者請於朝給爵賞旌勞者兩  
後入視州事善政種種不可殫述陞提舉常平倉司改



提點刑獄決滯清訟赫然如神明時有貴家害民震怒之又發富人粟故豪家比而致螫中有陳堅時爲御史中丞遂劾震免官福王與芮判紹興朝命震爲長史時不拜國事日戚朝廷宰輔爭避去震知不可爲歸寶幢山中誓不入城府震嘗告人曰非聖人之書不可觀無益之詩文不必作先是楊簡倡陸學士皆翕然宗之孔門博約之訓幾廢而震竭力興朱學人知向方每問經史文集輒跪其精要凡微詞疑義反覆辯論名曰日抄一百卷春秋禮記皆有集傳其死也里人私謚爲文潔

先生。

蛟峯方君錫先生

弟建振附

方逢辰字君錫淳安人初名夢魁淳祐十年舉進士第一理宗御筆改今名故字曰君錫累官兵部侍郎國史修撰兼侍讀除吏禮部尚書俱不拜先是丞相鄭清之賈似道擅權逢辰叩闕言時事辭旨激烈忤權相意乃稱疾以歸元世祖詔御史中丞崔瑗起之辭不赴卒於家逢辰天稟卓絕人物魁岸聲如洪鐘自幼刻苦問學夜誦徹旦無書不讀而會極於周程朱子之學以格物

爲窮理之本。篤行爲修己之要。自居幕職。至秉旄節。所  
至以教化爲先。務暇日輒從容庠序間。授學者以求端  
用力之方。東陽士聞義塾以迎之。從游者數百人。尋創  
家塾。授其徒。後以從官入侍經緯。度宗問其講授之所。  
御書石峽書院四字爲扁。仍賜手詔曰。近進士一科。文  
章盛而古意衰。卿以儒碩創家塾。以程朱之學淑其徒。  
朕甚嘉之。其眷遇如此。所著有孝經解。易外傳。尚書釋  
傳。大學中庸註釋。格物入門諸書。行於世。學者因其所  
長。稱爲蛟峯先生。肖像於石峽書院以祠之。

弟達振字君王登景定進士第歷國史實錄院檢閱文  
字遷太府寺簿宋亡退隱於家元世祖詔御史程文海  
起爲淮西北道按察僉事辭不赴聚徒講學於石峽書  
院以終學者稱爲山房先生以之配祀蛟峯其遺像贊  
曰金春王應絕學是續派宗紫陽規修白鹿以身衛道  
障川迴瀾大節匪虧進退可觀

兩浙名賢錄卷之三終